

29. EIPOTO YESU ILOOITENG'ENI LENYENA

Luka 5:1-11, 27-31; 6:12-15

Ore eiding'akino iltung'ana aamanita Yesu einining'u ilomon le Nkai, neitashe Yesu te mbata e naiposha e Galilaya, nedol impeuti are eirrag te mbata e naiposha. Netupukutuo ilarreshok loo sinkir aapuo aaisuj irresheta lenye. Nejing atua empeut nabo, naa ene Simon, nejoki meturumoi peno aitalam enkop natoyio. Neton Yesu aiteng'en olorere etonita ninye ti atua empeut.

Ore pee eidip airoro nejoki Simon, "Terewa enegut nintadoikiki irresheta linyi enaiposha aabung' isinkir." Nejoki Simon, "Lo Kitok, kitaasishote enkewarie nalulung'a neitu kitum toki, kake ore amu itejo, kaitadoyio irresheta." Ore pee eiko neijia neibung olkito turrur loo sinkir neiteru aang'era irresheta lenye. Neyuku ilchoreta lenye Yohana o Yakobo otii enkae peut meetu aaret. Nepuonu, neiput impeuti pokira are, o metaa keimis.

Ore pee edol Simon Petero ina nebatata too nkejek e Yesu, ejoki, "Olaitoriani, tung'uayioki nanu amu, kara oltung'ani loo ng'ok." Amu eing'asie ninye o lelo ooboitare, te nkumoi oo sinkir oobung'a.

Nejoki Yesu Simon, "Miureishoyu; ore ebaiki taata, *iltung'ana* intorioo aibung." Neyau mpeuti enkop natoyio, neing'uaa pooki toki nesuj ninye.

Ore pee elusoo inkolong'i kuti nelu Yesu, nedol oltung'ani osotu kodi oji Lawi (ashu Matayu), eton te wueji nesotunye kodi; nejoki, "Tusujuaki nanu." Neing'uaa pooki toki, neinyototo asuj Yesu.

Neitoomon Lawi ninye to sirua kitok netii esiamo kitok oo loosotu kodi o kulikae ake oodaa te nebo ninche. Neing'unyung'unyaki Ifarisayo o lasirak aajo, "Ainyoo pee ing'arierie endaa niokishosho te nebo iloosotu kodi o laing'okok?"

Newaliki Yesu ajoki, "Imeyieu iltung'ana biyot olkitari, iloomuoi ooyieu. Eitu alotu aipot lelo supati kake ilaing'okok meetu aairridu."

Ore nabo olong', neilep Yesu alo oldoinyo aomon, neton enkewarie pooki eomonito Enkai. Ore pee ekenyu neipot ilooiteng'eni lenyena negelu tomon o aare ti atua ninche nejo ninche Ilkipaareta. Naa Simon (keipoto Yesu ninye ajo Petero) o Anterea olalasho lenye; o Yakobo o Yohana, o Matayo o Ikulikai tenebo Yuda Iskariot.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Amaa, naji matejo ira Yesu, tenilo agelu ilkipaareta tomon o are, kaji pasa etui iltung'ana ligelu iyie?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA YESU? Kaji kinko pee kidol aajo ore Yesu naa Enkai?

- Kaji eiko teneitodolu ena atini nchere keata Yesu enkidimata sapuk?
 - o Eshomo Yesu enetii Simon o Lawi,
 - o Engolon te shumata enkitobirata enkop. Nepik isinkirr atua irreshata

- o Engolon pee eitore Simon pee eshukokino atua enaiposha neitoki anyok.
 - o Etaasishore isinkirr neipot ilkipaareta lenyena neing'uaa esiatin enye nesuj ninye.
 - o Nedol Simon Petero inchere ore Yesu naa Enkai! Neing'asia! Neipot ajo, "Olaitoriani."
 - o Engolon pee eipot Lawi. Nesuju Lawi Yesu nemeata inkikilikwanat.
 - o Keata engolon pooki, neaku Enkai kewan.
- **Kaji eiko teneitodolu ena atini nchere keyiolo Enkai (Yesu) pooki toki?**
 - o Etayiolo ajo kaji eiko pee eibung' iltauja looloo Petero, Yakobo, o Yohanna.
 - o Etayiolo enaiko pee erresh isinkirr kumok.
 - o Keyiolo enkipangata enye pee eitaa kulo payiani ilarreshok loo ltung'ana.
 - o Neyiolou oltau le Lawi ajo kesuj ninye.
 - o Keyiolo pooki toki, neaku Enkai.
- **Kaji eiko tenitodolu ena atini nchere eisinyati Yesu? (Kaasipani, eibayoroti, keishoru nkitanapaat, keiba ng'ok, neitame ilaing'onkok, neyau enkeeye anaa elakinoto oo ng'ok.)**
 - o Ore pee edol enataasa Yesu neureshoyu Petero nedol esinyatisho e Nkai o ing'ok enyena. Nedol ajo meishiakino pee etii tenebo Yesu te sinyatisho enye.
 - o Ata isinkirr lasima eas enatejo Yesu!
 - o Ore esinyatisho e Yesu naa sapuk alang' ene Lfarisayo amu mme entoki o iasat osesen ake, kake entoki oo Itauja! Keyieu neibeleyen iltauja pee etum aitisinya iltung'ana oleng'!
- **Kaji eiko teneitodolu ena atini nchere keata Enkai empiris? (enyorrata, neata olng'ur too laing'okok, esupatisho, neuro o ltungana)**
 - o Eshomo Yesu enetii Simon o Lawi pee eipot ninche.
 - o Neisho ilarreshok sinkir kumok! Keleng' Yesu oleng'!
 - o Neitoduaya kewan too ltung'ana loo ng'ok anaa Simon o lkulikae.
 - o Negelu ilaing'okok, iltung'ana lemeata tipat te kulikai tung'ana, ilaisinak, pee easishore te siai enye kitok!
 - o Neitagol Simon nejoki, "Miureishoyu!"
 - o Keipot Enkai Simon Petero metarresho iltung'ani. Negira aitajeu iltung'ana kumok. Neasisho tenebo olaisiayani lenye Petero.
 - o Neipot Lawi, oltung'ani osotu kodi, oltung'ani lemenyor iltung'ana ninye, pee ejing esiai enye.
 - o Neiput Lawi te nchipai, hoo ninye tenaa etalama esiai neata dupoto sapuk! Empiris Enkai to Itau lenye! Neaku etoosho entaleng'o!
 - o Ore amu eibeleyenya Yesu enkishui e Lawi, Neyieu Lawi ilchoreta lenyena neyiolo Yesu sii!
 - o Nanya endaa tenebo ilaing'okok, ilemenyorri too ilkulikae tung'ana.
 - o Keyieu Yesu neaku oldaktari too ltung'ana oomoi too ng'ok, iltung'ana onyorraa ajo ilaing'okok.
 - o Keyieu ilaing'okok nepuonu enetii Yesu.
 - o Ketii intaleng'o tenenbo Yesu too ltung'ana oata emboron.
- **Keitodolu ena atini ajo keisiligayu Enkai (Yesu)? (meibeleyenya, neas enajo, neitabaya nkisiligat.)**
 - o Kegira Yesu aendelea eas enki'ang'ata enye pee eipot ilkipaareta.
 - o Neliki Simon o lkulikai pee eitoki aapik irresheta te nkare neisho isinkirri kumok.
 - o Etejo Yesu eewuo pee eret iltung'ana oomoi too n'gok.
- **Keitodolu enkatini ajo ore Yesu naa oltung'ani sii?**
 - o Etijing'a empeut pee elang enkare.
 - o Einoso endaa neok enkare.
 - o Keyieu eretoto e papa. Neomon Enkai.

KAINYIOO KINTENG'ENA ENA ATINI NAIPIRTA OLTUNG'ANI?

- **Kelimu ena atini nchere keata oltung'ani tipat te Nkai?**
 - o Keyieu neasishore iltung'ana pee eas eisai enye, hoo naa ilaing'okok.
 - o Kenyor iltung'ana oomuoi too ltauja lenye. Nyena endaa tenebo ninche.

- **Kelimu ena atini nchere ore oltung'ani naa olaing'okoni neiririkino tesipata enkitamioto tenkaraki ng'ok enyena?**
 - o Keata Simon ilng'ashi te Yesu teneliki metipika irresheta enkare enkata e are.
 - o Nejo Simon, "Kara olaing'okoni. Meishiaakino natii tenebo iyie!"
 - o Kenyor Yesu teneret iltung'ana onyora ajo keata inyamalaritin oo ng'ok.(anaa Petero o Lawi)
 - o Eigurenare Ifarisayo kulikae tung'ana.
 - o Keiba Ifarisayo ilkulikae tung'ana.

- **Kelimu ena atini nchere keyieu oltung'ani Enkai amu meata enkidimata naitajeunye kewan enye?**
 - o Keureisho Petero te dukuya Yesu.
 - o Meata iloosotu kodi o ilaing'okok osiligi amu keata oloirerio!
 - o Ore ilaing'okok naa etiu anaa iltung'ana oomuoi oiyieu olkitari. Ore ing'ok naa emueyian nemeidim iltung'ana aishiu!
 - o Meyieu Yesu neret iltung'ana lemeidim atonyorrai ajo keata enyamali oo ing'ok. Eitu elotu enkop tenkaraki ninche, arashu "iltung'ana biyot."
 - o Eisiliga Yesu Enkai pee eret agelu ilikipaareta.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- **Kelimu ena atini nchere keishiaakino pee eata oltung'ani enkirukoto o enkirridunoto tenkaraki pee eitiship Enkai neitajeuni?**
 - o Eipanga Yesu ashet enkirukoto oo ilkipaareta. Neitodol eyieunoto enye pee eirridu nepik osiligi lenye atua ninye.
 - o Ore iltung'ana otinyikakitia Yesu te nkirukoto o enkirridunoto naa ketum omom enye.
 - o Ore iltung'ana lemeisilig Yesu naa iltung'ana oany aanyoraa ing'ok enye naa meng'amu Yesu ninche.
 - o Ata Yesu eisiliga Enkai Papa tiatua enkomono. Eisiliga shoreisho enye.
 - o Neing'uaa Simon, Yohana, o Lawi intokitin pooki nesuj Yesu! Ebaiki etapala Lawi biashara sidai oleng'. Keipotoki Yesu iyiook te nkirukoto eneba nji.
 - o Kindim atodol ajo meata inchere pee meng'amu Lawi ilchoreta lenyena aayiolou Yesu sii!
 - o Eton eata Enkai enkidimata? Keidim aibelenya oltau lino o enkishui ino? Ketii osiligi tiatua Yesu?
 - o Amaa, indim atoduaa ing'ok inono? Indim atonyorayie ajo imuoi too ing'ok? Naa miata osiligi tiatua kewan? Indim airridu too ng'ok inono?
 - o Amaa ijo ira kuti oleng' arashu olaing'okoni sapuk pee mikiyieu Enkai? Ekintagol ena atini? Amaa, ekindim Enkai ataasishore ata iyie?
 - o Amaa, iata olwuasa? Indim aigurenare kulikae tung'ana anaa ilaing'okok alang' iyie? Kainyoo kigira Enkai akiliki iyie tenakata?
 - o Keidimayu ajo ekimopotito Enkai ajo, "Intadoiki irresheta linono"? Arashu "Taasa entoki naje te nkirukoto"?
 - o Keing'uaa Simon Petero o Lawi intokitin pooki nesuj Yesu. Amaa, kainyoo doi eidimayu nikimopotito Enkai pee ing'uaa pee isuj Yesu?